

Fadhbanna le Pasanna

Ceist 1

(a) Beidh tú ag féachaint ar ball ar thuairisc faoi stailc in oifigí na bpasanna. Tá cuid den stór focal a chloisfidh tú sa cholún ar chlé thíos. An féidir leat féin agus an duine in aice leat na frásaí a cheangal leis na cinn ar dheis sula bhféachann sibh ar an tuairisc?


1. bhí sé ina chíor thuathail 2. An Roinn Gnóthaí Eachtracha 3. a gcuid dualgas 4. a chomhlíonadh 5. ceardchumann 6. murab ionann agus 7. tháinig deacrachtaí chun cinn 8. éigeandála 9. sa tsáinn chéanna 10. riaráistí 11. próiseas smachtaithe 12. chuir siad fainic ar an rialtas	a. their duties b. they warned the government c. backlogs d. there was a lot of confusion e. difficulties came to head f. Dept. of Foreign Affairs g. disciplinary process h. to fulfil i. in the same predicament j. unlike k. union l. emergency
--	---

1	2	3	4	5	6	7	8	9	10	11	12

(b) Éistigí leis an mhír anois – an raibh an ceart agaibh?

Ceist 2

(a) Éist leis an tuairisc uair amháin eile agus ceangail na habairtí ón mhír leis an mhéid a dúirt an duine nó dream cúí sa chiorcal.



‘...nach n-íocfaí daoine atá ag obair sna hoifigí a dhiúltaíonn a gcuid dualgas a chomhlíonadh...’

‘...nár cheart don rialtas a bheith ag déanamh bagairtí...’


‘...nach raibh oibríthe ag comhlíonadh a gcroí-dhualgas...’

(b) Cén fáth ar luadh na hamanna seo?

Maidin Inniu
Anocht
20 lá

Ceist 3

(a) Féach féin agus an duine in aice leat ar chuid de thíortha seo ón AE. Cad iad? Scríobhaigí ainm na tíre in aice leis an phictiúr cuí.



(b) An mbíonn na tíortha firinsneach nó baininsneach de ghnáth?

Ceist 4

(a) Líon na bearnaí sa phíosa thíos leis an fhocal cuí atá idir lúibíní.

Labhair muidne le bean amháin a bhí trína chéile – ní raibh sí sásta labhairt os comhair _____ (*an cheamara / an ceamara / na ceamaraí*). Bhí sé i gceist aici dul chun _____ (*an Spáinn / na Spáinne / na Spáinnigh*) anocht ach bhí a pas as dáta. Diúltaíodh _____ (*dá n-iarratas / dá iarratas / dá hiarratas*) ar phas éigeandála agus bhí go leor daoine eile sa tsáinn chéanna léi anseo inniu. Tá sé deimhnithe ag an Roinn Gnóthaí Eachtracha go bhfuil riaráistí de _____ (*daichead / dhaichead / ndaichead*) míle iarratas ar phasanna le próiseáil agus go dtógfaidh sé suas le fiche lá dul tríd na riaráistí sin. Dúirt an tAire Gnóthaí Eachtracha Micheál Martin inniu nach raibh oibríthe ag comhlíonadh a gcroí-dhualgas ach ní dhearna sé aon ráiteas ar leith faoi _____ (*phróiseas / próiseas / próisis*) smachtaithe a chur i bhfeidhm orthu. Ach chuir an CPSU, a dhéanann ionadaíocht ar na hoibríthe, fainic ar an rialtas gan a bheith ag bagairt ar a mbaill.

(b) Éist leis an mhír arís – an raibh an ceart agat?

Ceist 5

Pléigh na ceisteanna seo leis na daoine eile i do ghrúpa:

Cén fáth a bhfuil na hoibríthe sa mhír ar stailc, dar leat?

An bhfuil do phas féin bailí? Cén uair a bheidh sé as dáta?

Tá a lán Meiriceánach gan phas – an bhfuil sé amhlaidh in Éirinn dar leat? Cén fáth?

Treoracha agus Freagraí

Ceist 1

(a) Tá an cheist seo le déanamh sula seinntear an tuairisc.

(b) Ceartaigh an ghníomhaíocht tar éis éisteacht amháin.

1	2	3	4	5	6	7	8	9	10	11	12
d	f	a	h	k	j	e	l	i	c	g	b

Ceist 2

(a)

Ceardchumann an *CPSU* - ‘...nár cheart don rialtas a bheith ag déanamh bagairtí...’
Micheál Martin - ‘...nach raibh oibrithe ag comhlíonadh a gcroí-dhualgas...’
An Roinn Gnóthaí Eachtracha - ‘...nach n-íocfaí daoine atá ag obair sna hoifigí a dhiúltaíonn a gcuid dualgas a chomhlíonadh...’

(b)

Maidin inniu: Bhí radhairc dhrámatúla le feiceáil ag oifigí pas na tíre ar maidin. I mBaile Átha Cliath bhí daoine ag éirí fíor-íomnóch faoina socruithe taistil. San oifig i gCathair Chorcaí bhí na scuainí fada chomh maith.

Anocht: Bhí sé i gceist ag bean dul chun na Spáinne anocht ach bhí a pas as dáta.

20 lá: Tá sé deimhnithe ag an Roinn Gnóthaí Eachtracha go bhfuil riaráistí de dhaichead míle iarratas ar phasanna le próiseáil agus go dtógfaidh sé suas le fiche lá dul tríd na riaráistí sin.

Ceist 3

(a)

An Ghearmáin
An Iodáil
Éire
An Danmhairg
An Phortaingéil
An Ghréig
An Pholainn
An Bheilg
An Ríocht Aontaithe
An tSualainn
An Fhrainc
An Fhionlainn

(b) Bíonn na tíortha baininscneach den chuid is mó.

Ceist 4 (a) agus (b)

Abair leo na bearnaí a líonadh leis an fhocal ceart agus ansin éisteacht leis an mhír sin le feiceáil an raibh an ceart acu.

'Labhair muidne le bean amháin a bhí trína chéile – ní raibh sí sásta labhairt os comhair **an cheamara**. Bhí sé i gceist aici dul chun **na Spáinne** anocht ach bhí a pas as dáta. Diúltaíodh dá **hiarratas** ar phas éigeandála agus bhí go leor daoine eile sa tsáinn chéanna léi anseo inniu. Tá sé deimhnithe ag an Roinn Gnóthaí Eachtracha go bhfuil riaráistí de **dhaichead** míle iarratas ar phasanna le próiseáil agus go dtógfaidh sé suas le fiche lá dul tríd na riaráistí sin. Dúirt an tAire Gnóthaí Eachtracha Micheál Martin inniu nach raibh oibríthe ag comhlíonadh a gcroí-dhualgas ach ní dhearna sé aon ráiteas ar leith faoi **phróiseas** smachtaithe a chur i bhfeidhm orthu. Ach chuir an *CPSU*, a dhéanann ionadaíocht ar na hoibríthe, fainic ar an rialtas gan a bheith ag bagairt ar a mbaill.'

Ceist 5

Is féidir gach beirt a chur ag plé na gceisteanna seo nó plé a dhéanamh i ngrúpaí beaga.

Éimear Ní Chonaola

Bhí sé ina chíor thuathail ag oifig na bpasanna i mBaile Átha Cliath agus i gCorcaigh arís inniu agus é ar intinn ag daoine a gcuid pasanna a phiocadh suas. Dúirt an Roinn Gnóthaí Eachtracha tráthnóna nach n-íocfaí daoine atá ag obair sna hoifigí a dhiúltaíonn a gcuid dualgas ar fad a chomhlíonadh. Ach, dúirt ceardchumann an *CPSU* nár cheart don rialtas a bheith ag déanamh bagairtí. Tá tuilleadh faoin scéal ag Caoimhe Ní Laighin.

Caoimhe Ní Laighin

Bhí radhairc dhrámatúla¹ le feiceáil ag oifigí pas na tíre ar maidin. I mBaile Átha Cliath bhí daoine ag éirí fíor-imníoch faoina socruithe taistil. San oifig i gCathair Chorcaí bhí na scuainí fada chomh maith, ach anseo, murab ionann agus Baile Átha Cliath, níor cuireadh moill rómhór ar dhaoine a bhí² ansin lena bpas a bhailiú. Ach, is é an áit ar tháinig deacrachtaí chun cinn ná i gcás daoine a raibh pas éigeandála ag teastáil uathu. Tá na hoibrithe ag diúltú iad sin a eisiúint, ach amháin faoi chúinsí an-teoranta. Labhair muidne le bean amháin a bhí trína chéile – ní raibh sí sásta labhairt os comhair an cheamara. Bhí sé i gceist aici dul chun na Spáinne anocht ach bhí a pas as dáta. Diúltaíodh dá hiarratas ar phas éigeandála agus bhí go leor daoine eile sa tsáinn chéanna léi anseo inniu. Tá sé deimhnithe ag an Roinn Gnóthaí Eachtracha go bhfuil riaráistí de dhaichead míle iarratas ar phasanna³ le próiseáil agus go dtógfaidh sé suas le fiche lá dul tríd na riaráistí sin. Dúirt an tAire Gnóthaí Eachtracha Micheál Martin inniu nach raibh oibrithe ag comhlíonadh a gcroí-dhualgas ach ní dhearna sé aon ráiteas ar leith faoi phróiseas smachtaithe a chur i bhfeidhm orthu. Ach chuir an *CPSU*, a dhéanann ionadaíocht ar na hoibrithe, fainic ar an rialtas gan a bheith ag bagairt ar a mbaill.

Caoimhe Ní Laighin, Nuacht TG4, i gCathair Chorcaí

¹ *radharcanna dramatúla* a deirtear

² *a raibh* a deirtear

³ *ar phas* a deirtear